



崇蘭館集卷二十

雲間莫如忠子良甫著

男是龍校
是元輯

行狀

故中憲大夫四川按察司副使春山富公

行狀

公姓富諱好禮字子超別號春山其先河南洛陽人從宋南渡家華亭祥澤里高祖以誠曾祖

禎祖綱父洪是爲雪峯翁以公貴封工部屯田
司主事贈四川按察司副使母丁氏封太安人
贈恭人雪峯翁九舉子不育晚得公絕憐之不
忍程於學公年十三侍翁入城府過學宮覩師
儒文物欣然慕之翁因留公假館就學而旦暮
從所居來課其業時鄉大夫憲副良庵張公視
偉公屬其季子應隆教之應隆名士也公從授
毛詩學有端緒矣十九補邑庠弟子員正德庚
午舉應天鄉試庚辰中試禮部辛巳第進士授

工部屯田司主事嘉靖壬午奉使摧稅荊州荆
州推務於國課特重而機利易趨奸積莫詰公
至悉披其蠹條奏法所不便於商宜復舊制者
數事

上允之著爲令居三月丁內艱乙酉改刑部浙
江司主事丙戌丁外艱已還職庚寅奉命慮囚
淮楊壬辰陞河南司員外郎尋陞本司郎中時
有京師惡少某以事抵法公執而論之惡恚甚
匿詞衣督間潛入大內疾呼自刎舉朝愕愕爲

公危之而公車劾奏不報事竟寢則上密遣中使廉公故清慎所按獄不寃也癸巳銓部議擢公開封守會御史馮君恩言事忤冢宰下獄坐死公爭之力冢宰啣之因不與開封而改守重慶先是公嘗夢家萬山中及被命道出江漢過荆門下巫峽覽峨眉青城諸山之勝歷歷如夢中事而公平生宦蹟竟以蜀終夫人出處之際豈非數哉又豈啣公者所能使之然哉公在重慶以敦本實崇教化爲務察孝廉有行誼者表

其廬或優之廩給卹其婚喪歸其鬻子而於梗化甚者乃始一懲之朞月政治俗歸厚焉重慶所屬州若縣凡二十賦額故繁因爲弊數公至始爲畫一之法第給券於民而與之期民信之輸稅如市吏莫敢奸蜀府與都司劉永昌以事訐奏上命給事中御史各一人按其獄累月不決當事者檄公徃徃立訊之十日而獄具聲籍甚凡七登薦剡陞本省按察司副使提兵達昌建昌者西蜀極偏雜夷難治公攬轡慨然有

用夏變夷之心務威德並用因其俗弗擾之境
有大渡河故諸葛武侯渡瀘處每夏秋行者觸
瘡癘多死公閱險阻鑿山湮塹起海塘堡數百
里屬之省城三閱月而成孔道行者便之諸衛
初藉井鹽以給兵餉久而鹽丁亡去官軍豪者
專其利吏無所責稅急之則變生公知其然第
署諸豪者家官與之符令煮鹽如故而以數限
之因計應給月餼准其課額令下聞者咸自安
而亡丁多復業公於任官興革之槩大抵然也

三年巡撫李公欽特疏薦之會屬吏以殃民見
訟者公致於理而省僚某為造請不得因銜公
孽其細傾之於部使者是歲辛丑當大計天下
吏公遂飄然投綬歸既抵家日寄傲泉石自號
峯泖主人與其鄉薦紳先生數輩為耆英社云
郡有均糧議公與太守馮公力陳三鄉之分反
覆數千言而相國存齋徐公時為少宰亦條其
事書抵公公持以示有司議遂不果公所居鄉
號為積荒賦繁徭重民多轉徙公倡輸義田助

崇慶集 卷之五
後鄉人賴之公練於事以直諒爲有司重而未嘗干以私用是見禮其歿而邦人有典刑之思者英爲解社云公方面豐頤椎才曠度立心制行喜正大而惡險陂尤樂道人善遇事不平輒攘袂赴義人以是多之所交與盡海內之雋若宮諭嘉禾屠君應垓尚寶毘陵白君悅通叅崑山張君寰宮諫毘陵唐君順之皆以通家契誼數從晤遊赴期千里或相與探竒選勝輒以鉛槧隨所至有述曰前入蜀稿曰後入蜀稿曰遊

太嶽記曰遊峨眉
山記方梓行而晚從方士談
神仙之說殊好之時時閉關澄慮專氣守中沾沾喜曰吾道自足難語人也已竟不驗嗟夫彼術家流語長生久視誠誕顧以公之長厚幾仁者獨不足壽乎余於天道誠惑之矣公生成化丙午卒嘉靖辛亥享年六十有六配張氏累封恭人子男三長于文光祿寺監事娶屠氏卽宮諭君女次于德娶張氏故尚書莊懿公孫女次于仁娶顧氏故尚書文僖公孫女女三長適莫

如忠提學副使次適張承祖監生卽憲副良庵
公之孫次適白啓常禮部郎中卽尚寶子孫男
一可大郡庠生孫女二先是公疾革命其子于
文等曰余殆已矣知余者莫如相國存齋先生
宜乞銘余墓矣小子識之公歿其壻莫如忠適
解官歸拊其棺哭之而于文等道公治命相嚮
哭因俾如忠狀公行事曰是亦先公之志也如
忠不文無能以其言增飾公美而嘗侍公久於
其行事詳焉敢不投淚再拜著於篇俾于文等

携贄鉅公先生倘獲一言之祝以復於幽豈惟
富氏子孫榮之將如忠所以終始存亡公而明
子壻禮者亦容假寵於斯謹狀

勅封文林郎翰林院編脩志梅林公行狀
公諱某字某別號志梅其先陸姓世家華亭

里名文伯者公高祖也文伯生全以高年賜
冠帶全生庭訓庭訓生蘭是爲馨翁馨翁娶林
氏生子三公其季也公生三月而孤其舅氏宗
大公浩以父槎軒公命收公子之時宗大室王

生女二而無子愛公若已出公遂鞠於外沿林
姓焉甫六歲槎軒宗大公相繼沒王與始陳氏
皆寡居計非公無倚病則相與持抱泣曰嗟天
乎不爲二嫗餘生存此弱息耶公既稍長當林
祚之衰而能入奉二母出持門戶王患瘖日夕
侍湯藥不甘味不解頤而二母尋亦相繼沒公
終始二喪咸度於禮王所生二女公姊也公實
釐嫁厚資之尋擇產便利挈去殆盡弗問已而
貧窮乏來歸則復割產以居衣食之公既出繼

而陸毋林沒會陸氏亦中落兄伯仲皆蚤世公
獨執喪甚悼返柩故里披荆棘躬版鍤含馨翁
墓葬通波塘之原因舉伯兄嫂二喪仍購田以
贍墓守而收業其兄子孤貧不能立者二人嗟
夫公以一身係兩姓宗祀而皆當式微又所遭
皆死喪流離之戚乃能維持調護其間不遺餘
力使二姓如綫之脉咸賴不墜公之孝義稱里
俗者以此公性清嚴澁如其貌憤不能容人過
或應口輒發中無滯留尤不能隨俗俯仰咕咕

譽人而聞人已譽亦惶謝若芒負治家尚儉終身布衣蔬食至賑窮調乏則無所恡然亦不求人知嘗歲潦出行什畝見隣人田爲怨家疏其竇者第爲塞之而不以告其隱厚類是居常稍親書史喜談說古人嘉言懿行嘗錄古文辭如出師表義田記等數篇成軸懸之室中吟誦不輒課諸子靜夜篝燈危坐間舉所誦習勵之曰汝曹讀書豈必徼榮達以高吾門卽不媿古人志行足矣及子樹聲以會試第一顯行義卓然

而樹德舉於鄉志業方競則又輒喜念曰良踰吾望然未始爲意得也年四十五而配孺人沈卒誓不再娶有勸者謝不忍聞晚因諸子固請爲內一媵曰是取奉孟攝巾悅足矣不忍違吾志也諸子間以復姓跪而請泣然曰吾自襁豎受林氏恩當吾世而爲此非義然陸氏本源俟汝曹徐議之嘉靖某年以子樹聲貴得勅封翰林院編脩日尊顯矣顧益自斂迹蒔園刈蔬充然自樂鮮入城府人不敢干以私郡大夫有

蒞任三年而從入奠公寢觀遺像乃識公者縣
令罰坐法者金爲公壽謝返之巡撫夏公檄郡
爲其子樹聲建鄉魁坊以歲祲辭免時有司采
士論數徵公鄉飲不赴會邁疾卒疾之前一月
遺書京師子樹聲讀之心動卽上疏乞歸省未
抵舍而公疾革顧諸子曰吾平生不媿者此心
汝曹能念之吾且目瞑矣指案間一篋曰吾所
若遺惟是及歿啓視則遺誠一編諄諄於立心
砥行睦族厚隣仕爲良臣處爲良民毋媿人已

肥數語他無及也噫是可以觀公始終矣公卒
之日爲嘉靖壬子四月六日距生弘治庚戌三
月十八日享年六十有三娶沈氏贈孺人先公
卒子男三樹芳樹聲樹德女二長適奚日新次
適張紹孫男三壑國子生埜庠生元壽女六人
曾孫男二人女四人樹芳等卜以是年某月某
日葬公葑澳塘西祖塋之次啓沈孺人窆合焉
將乞銘於當世鉅公先生勒之貞珉以圖不朽
而樹芳等謂友人莫如忠雅辱游與能知其家

世猥屬之狀且寓書曰夫爲人子者先人已歿而肖其容有一不似非親也先人有善而述之一不似非親心也芳等雖不肖不敢以飾詞溢美愆下執事以傷先人之心惟執事圖之夫如忠不敏無能備注記之役以侍鉅公先生采而交公諸子間良習義不敢誣善以沒公平生敬述所聞可考信者爲論著其畧如此云

龔侍御考西荷公妣陸孺人行狀

公諱某字某西荷其別號也世居上海俞溪之

南高祖某曾祖某祖某皆脩隱德而某個儻有大度好施與里中德之奉恩例冠帶考某號隱翁遊邑庠以學行聞娶陸氏生公公生而敏慧長受學於鄉先達宋可葵先生先生審之曰若吾友也及長補邑庠與陸宮詹文裕公爲友督學黎公校士並擢異等亟嘉賞聲稱亦相埒從遊雲集而當隱翁家落又迫於官府之役公學遂弗竟時共惜之初公生十二年而母陸病且卒執公手曰吾生惟汝實無所遺禦溪之左有

田數十畝吾勤苦相若父所置也善保之公泣
曰諾及長隱翁繼娶瞿氏瞿無所出甚愛公而
公事之亦盡孝瞿頗不得於隱翁側室韓氏雅
當翁意微有形迹之隙公周旋二母間服勤調
護耦俱無猜韓生二子一女公友愛有加時其
婚嫁經理甚悉凡爲順適隱翁以慰其遲暮者
特至焉已復挈陸孺人手授盡歸其第卒使讒
間摧阻家慶藹然鄉稱善族公可謂能處人所
難矣性慎重簡默動而有度雖遇倉卒神氣益

閑御諸族子弟以禮有過正色道之期於必從
至恤其患難則不避艱險以故族子弟咸憚而
懷之課諸子若孫親爲句讀不以寒暑廢間舉
鄉士紳之賢者曰某孝行聞於家某忠義著於
國以爲訓誡亶亶不倦其慕義如此而晚年悉
以所學授子愷及姪情等曰汝輩好爲之予平
生歷艱茹辛冀以志業見而天靳吾與然龔氏
世有休澤其在後之人耶配孺人蔣氏故司諫
蔣公季子女也年二十歸公會門祚式微中匱

數窘又隱翁性剛而二姑志乖於中蓋西荷公之難處者於孺人爲尤難乃卒能委順推誠恭執婦道日潔羞髓奉舅姑務得其權其於韓二子一女服食豐約咸視已能辦要歸於厚終無間言暇則親女事率先婢御及下課農業夙夜靡遑備保咸得其所歲入取贏推贍宗族之貧者無恡故西荷公羈於公役或累月居外而得無內顧憂以孺人佐之也西荷公歿孺人訓飭諸子家範益嚴或咨嗟感嘆繼之以泣述西荷

公所以望於後人者督子愷永念之愷學成舉丁未進士令慈溪尋授監察御史孺人聞之始鞭然曰是足慰乃父於地下矣然聞先司諫嘗云臺諫耳目之司良不易稱也吾重有憂乎愷嘗京師期月而夢孺人疾旣覺心動方乞歸會兩淮監醮之命因行抵東昌而孺人之訃至矣西荷公生成化己丑十二月初六日卒嘉靖壬辰四月念一日享年六十有四孺人生成化辛卯八月初九日卒嘉靖辛亥十一月二十九日

年八十有一子男四長忱次懷早卒次愷次悌
女三長適某次適某次適某孫男十二長大化
庠生大倫大价大伸庠生大器庠生大偉大生
大偉大儒大佐大傳大倣大倣孫女五長適某
次適某次適某次適某孫男八女四莫
如忠曰余自弱冠交於侍御君侍御君嘗道其
家世從聞西荷公及孺人之懿詳焉庚戌之歲
侍御君方授官而余補外君握手欷歔非孺人
故弗道余爲憫然久之旣別去而君乞歸之志

決矣有以哉君立朝無何其風槩在公論而余
悲其靡鹽之節求言有懷於公及孺人之弗逮
有深悼焉茲合葬將乞銘於立言鉅公而涕泣
以狀余屬余不能辭敢撫所聞並爲論著如此
立言鉅公庶或是徵固侍御君廣孝以圖不朽
之心也謹狀

鄉進士五泉董君行狀

君姓董氏諱充大字汝化別號五泉其先汴人
從宋南渡來家海上今上海縣竹岡里也世行

在尚書王文肅公先德碑高祖某起家進士仕
南京河南道監察御史以諸子貴累贈奉直大
夫刑部員外郎祖承事郎某生子三其仲河南
都司斷事某娶宋氏爲華亭名族寔生君君生
而沈敏凝重秉有至性幼從斷事公遊南雍授
學故給事山陰徐達夫蒙養夙成迨長卒業今
司訓錢公振之之門學益邃刺經發藻蔚然成
章年十九會督學使者山陰蕭公鳴鳳試郡諸
文學得君文竒之以示兩邑令今尚書永豐聶

公豹故御史莆田鄭公洛書咸極稱賞首署君
名爲邑庠生時蕭公命題有曰董子度越諸子
而君名適兆公愕且喜進君曰是有數耶第勉
之何患不逮古人自是君譽日起凡試藝有司
輒占高等已歷內外艱稍淹抑弗售而君彌勗
所未至窮日夜研討學遂成嘉靖庚子鄉試應
天故大學士張文隱公今大司成龔公實司文
衡閱卷至君亟稱佳士龔公讀所對策識其卷
曰經濟才也可以自慶矣遂列名第六梓其義

及論以獻時吳下士莫不歆豔君謂二公並褒
然天下選首士所景附而君由以知名其於振
翼青雲之上以階顯榮無難矣乃竟數竒五上
春官弗第而君志不爲阻其敏於學無異少壯
時又好究觀當世之務凡刑獄錢穀兵防禮樂
之名物亶亶論辯莫必見之施行而溘焉遲暮
漸乖其初乃復推繹遺經勉課諸子長曰傳性
學行卓犖爲通儒次曰傳教領壬子鄉薦志業
並茂蓋君善教朝夕督楚不懈之效也然君抱

竒蘊英終扼其運而二子方起又不少湏以覩
其成傷哉君性孝友持父母喪甚悼時方窶甚
傾產以營善木必得乃已庶第四人斷事公歿
咸以屬君君撫愛周至長爲延師授室俾有樹
立並遊黌校居無間言毋弟某少與君齊名久
淹諸生抱疴積歲值寇變逋遷葺廬共處歿爲
棺殮撫其嫠孤加愛尤篤焉斷事公之歿門祚
中衰內外多故遺有積逋公命廢著償責而君
獨拮据繡縫入持門戶出禦外侮備嘗艱難業



原件短缺

P16

卒不廢總理內政規畫尤詳一屏聲色純綺之
習歸於朴素用以勤儉復振其家初君伯祖大
理少卿某於諸從孫中愛重君嘗稱之曰今之
賢子弟他日賢父兄也至是人謂確論云君與
人居任質推誠語不妄發至評論人物揣度事
變意所獨會則搯腕而談卽能言者鮮及張文
隱公有云若董子所謂闇然日章者也信夫雅
重廉隅不苟一介嘗善邑令曹某有託以關說
報百金者君謝曰若謂客取重邑令將因以爲

之言視踰華衮有足悲者儻當世鉅公誠知君
而志且銘之以敦始終之誼豈惟辱貺董君將
以稱於世曰士貴知己亦賢達之所以歿寧也

明故勅封文林郎廣西道監察御史一默

宋公行狀

封君姓宋氏諱蕙字國芳別號一默今廣西道
監察御史賢之父也五世祖道宜道宜生德政
德政生愛筠愛筠生前津公配金氏生封君蒙
氏世家華亭青村之北其地瀕海方五十里前

此未有顯者迨封君自少脩行力田毅然課子
賢以儒業三易塾師禮待優渥親程課誦夜分
乃已里中浮薄或誹笑以爲迂封君第曰是未
可量也異日亢吾宗光而里者惡知非吾兒也
侍御君承其志日競於學文行蒸蒸卓有時譽
里中昔誹笑者至是始交譽之會有芝產於室
數十莖歛穫嘉禾瑞麥各數本客入賀封君第
又曰是未足異也吾聞天之降祥於人也有德
則兆無德則否於是務增脩其德慕義強仁先

公家之急而役私橐墾蕪田以益賦䟽涸泚以
惠民續斷橋以通往來鑿義井以濟道汲其他
損貲折券排難解紛赴人之急者不可勝紀也
嘗拾得遺金廉爲鄉人朱姓者以壻逮獄從富
室貸金行免遺於途亟召還之時朱方以失金
憤欲自盡而遽見還喜甚持半爲謝封君笑曰
若何愚耶吾苟利此何如弗言朱姓感泣歸率
妻孥日夜焚香祝天以祈侍御君貴而侍御君
果以其歲甲午舉於鄉越甲辰取進士第時人

以方古還帶遺事云侍御君初授新昌令便道歸覲封君勗以奉法愛民諄諄不置侍御君拜而識之治以最著丙午迎養封君於宦所無尙封君不憚曰我無功德於國與民而竊冒祿養此不可以久居也遽促歸邑父老追送之有拾山梨野蕨獻者卻不受亦不與之面事載太僕呂沃洲先生文已酉侍御君膺召命丁母孺人吳憂不果行服闋封君督赴選部壬子春拜今職奉命按部陝西封君遺誠曰御史天子執法

吏非盡刻深鈎棘是賢欲爲小民伸冤抑以輔法也所關生靈視昔宰一邑異甚盍慎之侍御君旣竣事還朝爲乙卯夏三載考績例得推恩封君而先數日部院業上其名當復按部山東幾弗迨乃旨下則陪者行得考績推恩封君咸謂異數而封君又適就養都下躬拜命於朝步履鏘鏘衣緋佩玉觀者咸羨或播之文辭曰不圖復見周官養老之義也丙辰侍御君按部西蜀封君誠諭如在陝時以故侍御君歷兩

省並有聲稱封君教也先是倭夷入寇浙境去
淞尚遠封君卽語人曰亂且及矣瀕海之區其
爲墟乎於是亟徙城居不族黨之不能徙者
築室青村城中處之又不居之偏度隙地苦
廬數十楹以待鄉民之避亂入保者未幾寇至
所賴全活甚夥里中惡少乘寇退竊取封君儲
粟數百計獲而捨之曰亂離之後吾不能推食
解衣以賑流亡而令爲盜何忍又置之法卒弗
竟蓋封君平生好義每念不忘類此丁巳秋忽

溝疾少差會侍御君得代還過其家奉封君懽
僅浹月復病增劇以戊午二月八日卒於正寢
詎生成化十一月二十二日享年七十有二云
配吳氏先封君歿勅贈孺人子一卽侍御君
娶金氏封孺人女適盛鶴孫男二長邦乂國子
生娶刑科左給事中楊允繩女次邦交娶福建
行都司斷事何應福女孫女一適張璉莫如忠
曰余與侍御君自弱冠遊尋以南北畿同年鄉
薦爲通家因雅識封君迨其徙居郡城又與余

隣甚暱也余觀封君質性敦龐冲襟古貌與人
藹然中無隱忤或酒杯甚局狎而忘機以爲度
幾古所稱無懷氏之風者及考其行事率歸於
長厚如其人哉如其人哉慶衍後昆還集純嘏
雖當易簣之頃而萬里戒期及承永訣要非偶
然之故矣侍御君謂余能知封君屬狀其行事
如此

誥封曹夫人行狀

曹夫人者都察院左都御史笠江潘公配也夫

人歿其子山東按察司副使其某四川布政使司
右布政使其某南京光祿寺署正其以都御史公
命將治葬而

天子念都御史重臣夫人宜有卹典用禮工二
部議 賜諭祭 壇給帑鏹三百營窆宅如制
蓋殊恩也 命既下卜兆陳涇之原祖有日某
等蒲伏就莫子如忠泣道夫人之懿俾爲狀將
介以乞銘謹撰次其畧曰曹故世家宋樞密利
用之後播遷江南占籍海上曰天津公者以行

義著於鄉配張碩人亦出望族寔生夫人夫人
生八年而失怙夙閑母訓以慧善聞先是有望
氣者道吳松江上睥睨曹氏墓久之謂其居人
曰異夫斯若斧者之爲誰氏封也而有貴徵其
兆於女子乎居無何夫人生又夫人五齡忽嬰
劇疾諸醫罔效客或自他所造門請曰若家不
有女病耶無恐遂出懷中靈藥一丸與飲立有
瘥且曰是女異日當大顯好育之言已謝去莫
知所終天澤公神其事嘗謂張碩人曰兒生不

凡必慎所字而可會都御史公先娶包夫人踰
年卒父贈都御史願菴公母錢夫人爲擇良配
而錢與曹故姻家錢夫人因習知夫人賢而介
所親請卽張碩人亦聞都御史茂才也許之歲
戊寅夫人乃歸潘年十七爾而都御史大父默
軒公猶在堂願菴公仕儉三釜闕然所以爲養
而都御史方治儒退而謀諸夫人咸室家之急
夫人委順其指拮据攻苦以資滌灑奉不給則
脫簪珥繼之都御史用是得專力於學以壬午

領鄉薦癸未成進士筮仕守祁州則奉錢夫人
就養夫人朝夕扶將敬恭靡懈尤以勤儉率下
不廢紡織業如平居祁俗故不嫻紡織而聞都
御史所自助庶狀慕之有請以爲式者都御史
入言夫人出而頒其式於民令閭巷婦女得相
效習不半歲機杼之聲徧於境內而祁民遂足
於布如吾松君子謂季敬姜既貴而績以教民
勞夫人有焉而都御史之爲政視公儀休賢矣
居二年都御史以治和異等移守禹州夫人從

之禹州明年入爲南刑部員外郎夫人從之南
都旦暮諄諄以德業相勗有鷄鳴之風歲戊子
錢夫人捐館夫人與都御史喪之哀念姑早逝
而已不得如崔母唐夫人之孝以爲憾云比都
御史服闋出僉廣西按察司事奉勅提督學
校則顧菴公春秋高而都御史以南粵道遠重
曠定省欲無行夫人曰固也孰與君赴簡書義
妾留奉養而忠孝兩得焉都御史曰諾乃行夫
人事顧菴公曲盡婦道先意承志如事錢夫人

願菴公宜之忘其子之不在側也當是時願菴公總家政都御史與弟別駕君松崖秋官君滬南光祿君詒齋同釜而爨未忍析居妯娌時聚一堂夫人褒然表衆婦雍睦之範絕無間言時謂潘氏兄弟以友于令名夫人宜家之助也癸卯歲都御史爲山東按察司副使會當事者以他邾激怒

上謂省試錄語涉訕連逮監臨以下官而都御史在逮中禍且叵測夫人當匆遽時第相慰曰

妾聞禮義不愆遑恤乎人言君何愆之有以扞吏議

主上明聖必貫逮者而君與焉妾謹守舍中俟之矣比至京果見原薄其譴如夫人言聞者擊節以謂昔許允婦能度魏帝之明而以其夫免夫人卓識豈異於斯然都御史自是得左遷及終願菴公喪有間賜環載轉藩臬大吏晉中丞擢少司寇大司空大司寇御史大夫則夫人亦由宜人再封夫人尊顯矣而虔三命益恭之戒

蕤蕤飭節以布素終或言其太約謝曰世有忍
貧如山巨源婦而以其夫三公易介乎言者魏
服初都御史教諸子雅有義方夫人實相之自
諸子童時每從經師授書歸必親課卒業至夜
分而時從燈下治女工相勞苦有古柳母丸熊
之慈其後諸子學大成憲副君右使君相繼取
巍科而光祿君亦起監冑從仕矣則夫人日訓
之以惜名行建功業期毋忝忠勤清白之家聲
至訓諸孫亦云且曰若等生長富貴不見爾祖

未遇時事及余所共嘗者易漸驕侈可無深長
念哉憲副君由令兩邑擢南道御史將之官夫
人謂曰吾家世受國恩今復試若劇繁者再而
後徵入耳目之司不已重乎其必無負所學以
圖報稱可也右使君嘗督漕淮上夫人家居每
遇疾風甚雨必北向拃會籲天曰編氓百萬人
命懸於漕儲舳艫在道而脫不虞無言兒子奉
職無狀謂國計何及右使君竣事還拜堂下首
問糧艘得無恙乎而後即安蓋夫人之識大體

如此即古崔玄暉母申國夫人亢子以當官之法闡闡微言可著廊廟豈賢於是哉夫人平生少疾歲戊寅四月十五日偶以微恙涉旬而終詎生弘治十五年壬戌十月二十九日享年七十有七云子三長某甲子鄉舉乙丑進士今憲副君娶云云次某巳卯鄉舉壬戌進士今右使君娶云云次某起詹事府錄事今光祿君娶云云孫男八云云孫女四云云曾孫男三曾孫女三云云莫如忠曰余聞曹夫人之懿類若質行

無他竒然槩以詩書所稱徃徃而合乃知婦道之貞即操行萬殊要歸於經德而無儀之可名矧夫人者以令妻壽母終始於榮名祺履之坦途其所表見宜獨是著亦猶丈夫仕而當世願為良臣之心也厥惟初載神慧之符如兩異人事則豈天祚潘裔篤生夫人而復祚夫人令享有純嘏此其事非偶然者耶諸子用弁言首而予存之明古洽渭履武之祥即公侯好侏多有焉若夫抽彤管之編揚徽音之烈以彰示來軌

則固有待而非余辭之所能贊也

明故誥封宜人曾母袁氏行狀

宜人姓袁氏 誥封奉議大夫禮部祠祭司員外郎希山魯公配今知松江府事郡大夫如春之母也郡大夫先任禮部祠祭司員外郎考績宜人業 誥封安人迨

今上登極覃恩乃加今封云魯氏自石岡公某任潮陽縣貳娶熊氏生二子長山東道監察御史元山公某石岡公因得贈如其子官其仲某

即希山公初石岡公爲仲子擇婦曰吾宗故宋學士文昭公後今爲臨川西田里著姓亦既有亢矣又吾兒才誠得族望埒曾及女稱其嘉耦者而可於是隣邑豐城韶岡袁公某仕衢州郡守爲邑聞家配甘氏生宜人石岡公卜之兆遂委禽焉是時宜人尚少以婉慧聞及長閑母訓益務脩姱脩女德即女御等竟日不開笑語聲事父韶岡公母甘安人孝公喜曰女善事我必善事人矣及歸曾爲嘉靖乙未則姑熊已即世

宜人痛之孝養石岡公特至時時從婢御侍公者伺寒燠食飲所須每進輒中室或不給至罄父家奩貲繼之乃固不令翁知也久而翁廉其故則大賢宜人嘆曰有婦若 七曾氏其昌乎希山公在黌序裒然諸生間業 一切內政咸倚辦宜人宜人早夜拮据自蒸嘗宴享百需以至米鹽井臼之細必身親之與希山公居執禮恭甚有古舉案齊眉之風希山公治家嚴宜人恒以寬濟之欲有言於公必俟公色定從容起

諷諭之多所匡益而公竟數竒屢試場屋弗售勉就國學則諸子者方相繼穎出斬然露頭角矣公喜顧宜人曰兄曹可教吾志所未逮將無取償於斯乎宜人諭其指乃益經費佐公延師授粲課諸子藝日有程即嚴冬盛暑不輟或諸子業不中程而希山公督之過宜人則復前解曰豎子孱不任督譬若治芟徐乃理解爾其善節宣勞逸以成公義方之教類如此宜人慈祥仁恕自其性成睦於妯娌厚於宗枋戚屬下逮

臧獲之賤咸有恩視人疾苦若切惘瘵或脫簪珥赴緩急未嘗以匱辭故一時稱毋賢者合內外踈戚交口無間然至於慈鞠劬勞視諸庶子不異所生尤宜人大節彰彰列者也先是郡大夫官行人奉使 韓藩已齎冊立 東宮詔使南直隸兩廣江西開讀咸得展其梓里爲宜人壽及擢禮部主客司郎中之明年癸酉聞宜人疾卽陳乞歸侍湯藥奉起居者踰年而宜人病良已乃大夫念之不置無意復出至乙亥秋希

山公固遣就道卽宜人亦曰兒聞靡監之義乎吾幸已安其無效兒女子態徒眷眷吾側也大夫奉教勉復之京補儀制司郎中尋拜出守廬州之命遣力迎養宜人宜人不往第返誠曰兒專郡矣 國恩在上民命在下奚不是急而以家爲大夫不能強會方改任松因如松甫閱月爲萬曆己卯春正月二十日而宜人之計至矣惜哉宜人有子曰如衢者業舉於鄉不祿曰如阜如衛咸雋才天不宜人痛之所自致疾與鬱

鬱覓其歿者獨此然以大夫之光孝暨第如川者亦方捷省試而餘未有艾也則宜人榮哀之脩亦既無憾於幽矣宜人人生正德丙子四月十五日卒萬曆戊寅十二月十八日享年六十有三子八長如衢舉嘉靖辛酉卒次即某登嘉靖乙丑進士任今官次如川舉萬曆癸酉次如阜次如衛俱庠生早世俱宜人出某某側室某氏出某某側室某氏出孫男二某出孫女一某出適某人子郡大夫之聞宜人計也號痛幾絕不

能杖起入吊者而獨蒲伏就莫子如忠泣道宜人平生如前所云且曰不肖某罪惡實及母而後額額走四方至弗獲親含歛悲何忍言而幸承乏松及侍其鄉老先生之耆碩雅不余擯願爲母乞銘諸墓而以狀溷執事先之倘遂因得請亦猶曰此仕松之效也母靈慰甚而於不肖未殞之餘息且獨無忤乎如忠固重大夫以其才施於松未幾即訇訇有聲而惜其方銳之志欲爲松樹諸不朽者迄未就乃獨憫然孝思其

篤於宜人若是又足悲也故於大夫命無所辭
如以蕪漫之言足當運斤者之郢質也則何敢
云謹狀

封宜人楊氏行狀

宜人楊氏今封奉政大夫工部都水司郎中竹
窓周君之配湖廣按察司僉事思兼之母也楊
氏其先自諱某者仕宋太子洗馬自後代有聞
人至東溪君欽爲伊府典膳以仲子臨江同知
細林先生貴贈文林郎延平推官東溪有隱德

配沈孺人以淑慎稱寔生宜人宜人因漸於閭
範自幼言動造次皆有度而性復慧善能解文
辭如孝經內則列女傳女誡諸篇莫不悉其指
義大父博菴君鍾愛之屬子東溪君慎所字而
博菴雅善封君大父西隱君見封君而噐之西
隱君之子興國主簿一山君因以父命爲封君
納采焉宜人既歸封君時年十八會周氏中落
歲儉幾不支宜人謂封君曰妾幸獲侍夫子將
共立業而令生事若此不早爲計能坐視覆墜

平夫子誠有心妾不難鬻簪珥爲助封君然其
言以告西隱君西隱君大說乃悉以家事屬封
君而宜人拜姑嫜甫三日出操井臼執婦道若
素閑旣乃晝夜拮据作苦躬紡績以易薪粟一
切內外百需公私逋負咸倚辦焉而周之族黨
籍籍稱宜人矣時西隱君與一山皆在堂而祖
姑戴孺人姑顧孺人兩世皆繼室宜人周旋其
間伺意指同異調護之各得其權朝夕供具未
嘗以匱告有竭力奉滫瀡而已不厭糟糠者兩

孺人念以貧故獨苦宜人議盡廢著三分之各
爲爨以糊其口宜人前泣曰毋爲爾也夫人有
子孫縱貧不能養而今自爲爨何面目立於世
乎新婦願卒服勤畢此生有不繼者夫婦爲傭
以具糲粥無所辭兩姑感悟乃止宜人事西隱
君無異事一山君西隱君得風疾不能飲食封
君捧盤盂以進宜人佐之左執餐右代箸乃得
食如是數年竟其歿一山君嘗語人曰吾固知
新婦孝乃又成吾孝也封君有戶外之務不能

決者入言宜人宜人計可否揣成敗輒中以故
封君所行寡尤怨於人里中以德厚歸封君則
必本其內助之賢也宜人平居與婦女言必稱
徃行如夏侯令女孟德耀奉天竇氏蔡人之妻
孟母陳孝婦等以爲訓誠隣有節婦宜人雅敬
之數餽遺勗以無改行焉嘗曰書云牝鷄晨鳴
惟家之索吾平生不敢私貨財及私假與爲專
行者惡夫婦人以賢知驕其夫所謂晨鳴之婦
非倡隨之道也治家尚嚴雖惠於御下至于孫

有過則督讓無所容嘗謂僉憲君曰自吾歸汝
家辛苦相汝父僅能不墜其世以奉蒸嘗汝惟
績學勵行更大有樹無忝爾家世稱善人後真
吾子也汝舅以文學名於時欲求賢師殆無以
過盍謹事之蓋謂細林先生也故僉憲君自總
角卒業細林之門與其子今禮部郎中朋石君
同事筆研聲稱並起皆舉下未進士人謂僉憲
君幼學外家固當宅相而宜人知人之鑒亦不
可及矣宜人性安儉素居官邸不廢織衽常服

澣濯衣謂子孫曰吾非有靳於是顧見比者鄉
閭子弟席資寵爲汰侈非家法耳僉憲君宦遊
所如當別宜人輒訓之曰昔崔玄暉之母盧夫
人能使其子卒成令名可念也汝能爲清白吏
無異窮約時卽吾願足矣不富貴慕也故僉憲
君所至以清慎聞宜人教也宜人家居疾革僉
憲君行部黃州忽心動不安席者浹旬而計將
至之日舉家少長亦達旦不寐事竟兆豈宜人
之生聰明不類凡女子其死亦有異徵者耶宜

人生弘治丁巳四月九日卒嘉靖丁巳九月十
二日享年僅周甲子云子男二長卽僉憲君思
兼娶張氏封宜人次思齊娶沈氏女適陸世德
歲貢生箎之子孫男五紹芳紹德紹元紹節紹
文孫女三長受南安太守張東海弼之曾孫德
瑋聘次受工部侍郎張賓山電之孫恩生元聘
次受方伯沈西津侃之孫希望聘某年某月某
日卜葬宜人於蔡成涇南祖塋之次僉憲君以
封君命將乞銘鉅公以圖不朽衰經扶杖涕洟

詣余俾狀宜人行嗟乎余自識僉憲君觀其志
節耿耿古人與稽以爲才生不偶所自含英孕
竒當必有母儀之賢如宜人者及君爲予道其
故始詳且曰惟子之言質將徵信於撰著其無
辭夫愛之斯錄之矣君懼宜人之懿泯而不錄
宜無弗用其愛者而詮次之後乃及芻蕘則其
意當必有在而予言之足脩採擇與否又未敢
必於大方之家也謹狀

誥封通議大夫南京工部右侍郎海觀董

公行狀

誥封通議大夫南京工部右侍郎董公諱體仁
字公近別號海觀今少宗伯傳策考也其先汴
人宋南渡徙吳家海上竹岡里歷元迄國初
曰官一者公始祖也官一生仲莊贅韓氏以代
婦翁某白寃死京師人多其義生二子長思賢
贅錢氏因沿錢姓今廷評志學其後也次思忠
遺安公寔大董氏遺安公三子長怡竹公諱真
有隱行怡竹公二子其仲介軒公諱綸舉天順

甲申進士仕終南京河南道監察御史有聲生
六子其四守菴公諱懌素廉直持高節薦經明
行脩謁吏部不屈罷歸尋舉弘治辛酉鄉試仕
歷磁綿兩州守所至持冰蘖多惠政嘗發分巡
僉事某奸因自劾致仕已蒙 恩進階奉直大
夫爲族黨所敬憚於公祖也守菴公二子長諱
繼芳邑庠生有淳德早卒追號惜齋公以孫少
宗伯貴貤封三代贈通議大夫南京工部右侍
郎配張氏贈淑人寔生公而惜齋公之歿也公

纔十有四齡綿州公撫之時綿州旣辭官四壁
蕭然顧益持耿介視族屬諸顯貴若饒於些者
蔑無有也而獨務教督公以古人自期所課藝
日有程不中程不休公亦因自淬礪籍譽諸生
間弱冠補郡庠弟子員試有司輒高等郡守順
德何公以國士遇之時時手其文語人曰是清
白吏子孫也宜有亢然公益以禮自坊非旅進
不守謁守愈益重公未幾張淑人歿又未幾綿
州公及配馬宜人相繼歿公哀毀踰禮勉襄三

喪邁疾幾殆歲餘乃起羸然也而猶不廢強學
務成綿州公志然乃屢蹶秋闈又廩食學宮久
當序貢公再讓窮交兩生他行誼淳古類是先
後督學使者如臨川章公古蘄馮公衡水楊公
咸人倫之鑒至輒下部符勸學以德行旌公丁
未竟膺貢已酉上春官因就北畿試已卒業南
雍而少宗伯是歲舉應天明年庚戌成進士越
壬子公又以南雍選首再試應天不錄乃嘆曰
吾業不後人而竟齎志命也遂絕意進取而少

宗伯適自太常博乞告歸公日與探究先賢問
學古名臣竒節善行及國家典章廢置所繇而
少宗伯因杜門不涉外事父子間隱然精脩有
師資之義焉及少宗伯再出公誡之曰所貴學
者要以報國致大義若宦路升沉人情贊毀俄
頃事爾少宗伯仕刑部即因論時宰不法事被
逮拷掠脩至詞氣不屈尋謫戍廣西南寧衛輿
情嗷嗷懼無以慰公公聞殊不為愕第曰兒素
癯得不死報國尚有日也客有相訊者引歐陽

永叔縱令得罪而死不爲忘親之語復之聞者
咸服君有間裘糧躡徭涉數千里視少宗伯戎
所心搖搖初若弗怡及至見少宗伯無恙甘貧
讀書蕭騷一室則喜曰吾志也不謂兒踔厲之
節乃能順變處窮如是能善養矣吾後何憂遂
別去時粵人士尊事少宗伯學行因亦尊事公
如父師扳轅留之不忍釋云公歸數年會奉
世廟遺詔召諸言事臣還少宗伯拜命公益喜
曰非特兒獲忠褒卽予亦以遲齡幸及覩此自

今而往余曩所云報國之日於父子餘生豈有
愛乎以故少宗伯所至諤諤正色立朝雖歷險
夷顯晦不少渝也蓋成公志云 穆廟初少宗
伯業自郎署歷卿寺已乞南由工部侍郎改今
官數年之間會 朝廷屢以大慶軍恩公三膺
封典初封承德郎刑部廣西司主事已加封中
憲大夫太僕寺少卿已又加今封配宋氏封淑
人而少宗伯因得推恩祖父母贈如其封蓋異
數也公方歎然自視有偃偻循墻之思時仲子

傳史亦已捷丁卯鄉試季子傳文弱冠試學宮
高等公輒誡之曰吾宗代有聞人抑士所貴者
節行爾大兒雖與世落落然有古人志焉吾爲
汝曹願之若榮名於世駒隙爾曾足爲此生軒
輟哉公於見道之言貽爲義方者每若此故不
惟少宗伯用以光昭駿業爲世名卿卽二昆志
行方競翹然士林矣公誠樂此以頤天年而人
亦以純嘏願公未艾也今歲甲戌春偶疾作考
終正寢爲二月十有八日先是少宗伯以被誣

待命還里會仲弟會試禮部未還乃率季弟傳
文朝夕侍湯藥盡瘁疾革少宗伯顙天乞以身
代弗獲哭踊不勝幾絕毀瘠之容吊者不忍視
而嘆近世士大夫家稱君喪有禮若此者可以
訓已公至性純一質行恂恂尤篤於族黨姻舊
嘗罄產代償叔逋免其力役贍養以終其年嫁
一姊一妹及若從昆弟遺孤外家嫠寡之無依
者調護之尤厚其諸窮悴故人待公而賑如里
俗所傳及諗於其族黨者可歷而指也公耻鄉

俗浮靡雅崇儉素如爲諸生時居不華屋食不
重味坐無雜賓家無黠僕持門戶尤飭動稟紀
法而行族子弟有過面數之不少假必改乃已
尤不喜徵逐出御中車大吏之入境及郡邑大
夫禮其門者不廢歲時謁謝而已諸凡戶外事
稍涉非義遠若負塗絕弗通謁縱屬切已務宜
直者寧以理遣不屑濡迹公庭也蓋公雖翛然
古貌與物溫恭而耿介中嚴雅不同俗卽少宗
伯大節凜然一成於性而樂與人善意獨肫肫

若與公均劑而相成然者蓋盛德懿範所從來
也少宗伯在禮部端已率物官舍肅然乃有市
黠非嘗之感少宗伯憤發於義爲名節開而事
謬本始且浼及公一時縉紳大夫鄉黨士庶咸
抗言明之而公弗爲動第貽書少宗伯曰見此
舉所發不差古人所謂當怒而怒非激也又曰
以汝平時自信不阿寧免今日然不教汝易方
爲圓士誠各有重也嗟夫繇斯兩言公之志已
足較然暴於天下矣卒之心迹久而益明所司

議

上白其狀甚辯竟奉 俞旨公無所點而於少宗伯大臣之體若鼎呂之無失重焉吾於公始終奚憾哉公嘗設教諸所授經出其門者彬彬然質有其文公歿咸識之不倦其諸識與不識誦義無間言又 以觀人心之公矣公配宋氏卽淑人故六

弟處士先生女也子男三

長卽少宗伯傳策娶李氏累封淑人先名臣憲使李公冢孫洞溪先生女次卽鄉進士傳史娶

胡氏庠生胡君女次卽傳文郡庠生娶李氏憲副公從子國子生某女女二長適庠生俞咨臯憲副俞公從弟次適國子生何一鵬傳策傳史俱宋瀛人出傳文側室王出孫男九人傳策出者一曰高明疹殤一尚幼女一適庠生李自約國子司業李君從弟傳史出者男二一曰玉樹聘陸氏禮部尚書陸公從子國子生陸君某女一尚幼女二一受僉憲戚君男應科聘一尚幼傳文出者男一女一俱幼公生正德丁卯十二

月初三日比卒享年六十有八云少宗伯卜以是歲甲戌某月日葬公之原手錄公行實率二第詣如忠俾狀之如忠憶爲諸生嘗從公研席遊時同遊者凡一數輩公於齒長而行業亦衰然儕類中咸共推轂余藉切劘爲多而因獲覩守菴公倮然偉丈夫也業老矣猶手著時義日干言爲公範而持論侃侃聞者爲之歛衽當是時望屬公異甚卽少宗伯亦日有聞矣余因以卜董氏世澤淵源宜有大競爲俗化勸

祭文

而果及覩少宗伯之亮節掀揭出九死一生以匡國是令海內仰其聲光於上承公志視世之厯厯然以箕裘之嗣稱孝云者大逕庭矣而天之生公又豈特爲董氏昌裔之錫已哉故云

同門同年十七人祭序考張賁所先生文
茫茫分野南極滇池碧鷄金馬含英蘊奇篤生
先生會茲昌期溯源考德粵惟先公兩朝耆碩
八座登崇有美伯氏馳聲藝圃輝映雙珠墳麓

迭和惟我夫子。明睿夙聞。英標玉韞。令德蘭芬。
蜚談傾坐。摛藻軼羣。始薦於鄉。褒然首舉。櫛生
一鶚。孔融是與。尋謁南宮。翱翔魏闕。晁董陳辭。
籍甚朝列。尋居郎署。改命銓曹。職叅六典。司鑑
百僚。雍容彥輔。密啟山濤。校士禮闈。聿持文柄。
登明選公。黜華從正。梁公桃李。於斯爲盛。濟濟
彙征。志輔王室。良會靡常。畏途多窒。三上仲容。
一麾乃斥。藩臬優游。振揚風紀。公論駸彰。會虛
當宁。名高謗興。道峻多忌。帝念孤臣。放歸桑梓。

投綉浩然。視猶敝屣。縱心域外。庶幾平子。蒼生
望違。東山不起。尚湏樂志。永賁丘園。不盈其位。
或假之年。天不佑善。溘殞大賢。嗚呼。木壞山頽。
謙德不福。絳帳已塵。卷衣已復。太丘云亡。有道
無祿。斯文永哀。命不可續。某等才謝珪璋。器慚
梗梓。濫蒙采甄。廁名國士。慨自入官。迄今逾紀。
迹若萍浮。互有轉徙。或投藩鄙。或邇王畿。或司
專闈。或守舊蹊。顯晦不一。處志則齊。籍湜指教。
忍負昌黎。譬諸斗岳。是瞻是依。庶幾夙夜。服膺

弗違。何期代謝。始願終乖。德音猶邇。訃音倏來。瞻容莫及。報德何階。嗚呼。我懷古人。惟徐孺子。千里束芻。以哭知己。汝南孝廉六君並起。宣公。卹居耦俱無貳矧。余有衆四海同心。銜恩感遇。并爲一忱。治任築室。道阻且深。聊因洞酌。遙拜。敷衽。明靈不寐。來格來歆。

祭吳石湖先生文

嘉靖某年月日。我明荆府左史石湖先生吳公。卒於家。越月某日。鄉之縉紳大夫某某等。謹以

柔毛剛鬣。清酌庶羞之儀。致奠於公。而告之曰。嗟夫。古之君子。其歿而係人之哀者。亦各有從矣。蓋子產亡而鄭人廢杵。羊公歿而峴首銘碑。此功之著於民者。而其民哀之。君山鍛羽。高雲敬通。推翻風穴。此遇之阨其才者。而才士哀之。賈大夫以長沙殞命。衛洗馬以豫章不祿。此年之弗究其志者。而志士哀之。乃若其功不必可著。其遇不必可悲。其年不必可憫。要以隱約行義。表正鄉閭。存有令名。歿遺永悼。如古陳太丘。

郭有道之倫者異哉。所聞然於世教，則惡可少哉。求之自今，於公覩矣。公宏才宿學，奮跡魏科，仕竟藩僚，位弗酬德。吾無所誦其功，中歲懸車，丘園養晦，巧宦非性。貧窶是安，吾不復悲。其遇膺力聰明，願真逸老。上躋耄耋，正命考終。吾不復憫其年，獨以公之重厚，恹恹植自天性，終身篤行，矚然不緇。海內鉅儒淵源師友，讀書談道，稽古立言，嗜學瞿瞿，迄於沒齒，俾鄉之三老後來俊髦，景企餘風，廉頑悖薄，流波斯挽，俗化繫之。卽古所稱陳太丘，郭有道云者，公何愧哉。公何愧哉。夫太丘之殂，群僚揮涕，有道之卒，巖穴與衰，矧盛明風軌遠邁，東都吾鄉士紳雅高行誼，逝者不作，喪我典刑，此其爲情又焉異昔。乃相與介茲羞醪，會奠公寢，爲辭告焉。知哀之有從也。尚饗。

祭婦翁春山先生文 有序

嘉靖三十一年四月某日莫如忠自解職提學貴州副使還，蓋吾岳翁四川按察司副使春山

先生卽世五閱月矣。柩在寢未葬，忠入哭之，因憶昨歲被檄走萬里，就翁別也。翁已病卧，衽蓐猶進忠語，款款而忠行，因數念翁，憊矣。然不謂遽至爾也。及忠從楚，即陳乞言，旋計侍翁，伊邇而翁遽捐我，遐逝乃悟。昨語款款者，之爲未訣也。悲夫！忠自髻齒托於婚姻，佩翁子視之愛，餘三十年，余內既已中天，而當遲暮復與翁爲人世無期之別，又數月而始獲哭翁於寢，余情愴悼，其何如哉！敢具牲粢酒醴之奠，披淚爲文以

告。而敘翁平生哀之，其文曰：繫天降靈，惟哲量厚。淵毓其泓，嶽增其阜。高朗性成，器弘行懋。邦翰斯良，天衢斯驟。撫壯揚靈，奕奕蒸蒸。試工惟叙，象刑惟明。爰割蜀郡，晉握憲衡。文翁之化，相如之名。邁此昌期，卓有令譽。會歷台階，奮揚當宁。儉人間之，構以蜚語。投紱飄然，林泉燕處。諳於闕世，譬彼太行。峻巖安極，晷促意長。游心物外，慨當以慷。式歌且放，恬乎徜徉。跡瀰海岳，題富縑緗。當杯中聖，遇博亡羊。翁志有托，聊以和

光啓有胤緒。蘭芷琳琅。承家醞玉。緯國含章。人
羨翁社。天之所植。靈筭冲融。方躋耄耆。溘遽云
殂。罹此荼烈。閭里摧賢。耆英喪哲。知與不知。嗟
咨載道。謂曷彼蒼。愁不遺老。矧余子壻。怙冒情
親。通家累葉。申之婚姻。穉齡見竒。許以國寶。比
潤慙倫。啣恩罔効。傷哉早歲。室子捐帷。文蘿中
斷。言念獻歎。惟翁惠眷。存歿匪殊。余父事翁。翁
子視余。庶幾沒齒。長侍音徽。歲月淹忽。事與願
違。翁已淪逝。余迺來歸。翁魂靡返。余歸疇依。堂

廡。昨是言笑。今非塵蒙。几杖曠掩。泉扉臨風。奠
竿。湏涕沾衣。惟靈弗昧。余言表徵。嗚呼哀哉。尚
饗。

祭唐荆川先生文

於惟先生秉宇宙之正氣。挺川岳之孤英。一言
一動。可貫金石。可質神明。一出一處。民用是望。
士用是程。辱不以貧賤故。安貞苦節。遺俗而獨
醒。榮不以軒冕故。忘家報國。盡瘁而捐。生蓋
畏天悲人。志康世屯。立言明道。功多聖門者也。

嗚呼無窮者先生之心方振者先生之業卒殞者先生之命不朽者先生之名忠自弱冠挾策神京偶蒙品藻雅竊師承溯及門之有日慚竟晚而何成惟德音之在耳庶終身而服膺曾違別之幾何溘未隔乎幽明予懷愴怳延首涕零攝束帛以適往跪敷衽以叩靈嗚呼哲人逝矣木壞山傾是非千載孰觀其深哀哉尚饗

祭陳後岡先生文

惟靈鐘川岳之秀兮撫景運之昌夙蜚笑於弱

冠兮倏鵠舉而鸞翔志希顏而慕軻兮藝軼馬而追揚既含葩以擅藻兮亦入室而升堂縉紳羨其籍甚兮學士軌其遺芳允休明之國寶兮方登薦於珪璋曷中道其隕穫兮溘委化而摧藏豈造物之忌姘兮乃喟焉而逢殃孰有知而無情兮不愴怳而奠傷蹇余材其何述兮嘗跋履於門墻回負轅於一顧兮登輪困於明堂意未竟其先厄兮羗握瑾而流亡函余悰於十載兮慙余禮其未將肆懷舊以歷墟兮感涕淚於

山陽謂速朽其達人之志兮。奚未返乎故鄉。莫悲乎君之志兮。將窮也固士之常。撫遺孤以增慨兮。悼斯文之將喪。九原繫其不作兮。聊臨風而奠觴。

祭婦翁楊五川文

某歲月日子壻莫如忠謹以牲醴之奠告于山東按察司兵備副使五川楊公之靈曰。惟公儒哲之裔。川嶽之英。賢科濟美。膺仕騰聲。水部分曹。南宮振藻。東閣延賢。西樞秉要。風雲之思瓊

瑤之編氣。惟當世目視無前。言危見尤。才高賈忌。節鉞投荒。兵戎是寄。公非其好。解組來歸。冥鵠舉弋。慕何爲甘寂。遺榮閉門。謝侶著論。潛夫寓言。秋水學將年。競道以約。伸仲長樂志。原憲安貧。公之高風。今鮮其儷。謂壽且康。百齡可俟。胡天弗弔。溘收其良。蘭摧玉殞。士紳與傷。太丘懿行。孰表而宣。茂陵遺稿。孰緝而傳。清白遺風。煢煢胤嗣。箕裘未弘。公目猶視。忠生蹇拙。水玉慙方。外家宅相。豎子何當。婚姻之依。悼亡之

嘆終始幽明。斯緣已幻。百里奔計。來哭公靈。余言有既。余祗曷傾。嗚呼哀哉。尚饗。

祭座主廖洞野先生文

維嘉靖三十年歲次辛亥十一月朔越四日貴州按察司提學副使門生莫如忠以之任取道於蒲由故翰林院侍讀學士洞野座主先生之故里。造其廬。存其子。而墓拜焉。謹陳酒醴之奠而致告曰。於惟楚甸。皇輿與區。孕英衡嶽。豬委洞湖。斯皇誕哲。式際昌圖。文章黼黻。然鉅儒。

為國之寶。為士之模。天曷不吊。中道云殂。摧翮風穴。筭步天衢。章縫悼切。宣室恩虛。矧忠淪藐。風造賢羅。採芳及菲。掄材逮樗。義存知己。明霜敢渝。山川紆阻。啣咽未攄。茲當被命。萬里戒途。哲人其萎。歷此故墟。室塵絳帳。里闐籃輿。江楓黯慘。墓草蕃蕪。魂招靡返。目渺愁予。披秦設奠。有涕漣洳。

祭董海觀文

嗚呼。泖峰毓秀。寔誕哲人。行高振俗。學博空群。

崇禎... 卷之三

持以挹損。秉茲龐淳。古心古貌。師表人倫。如珠
藏淵。如玉韞櫝。世德繩繩。益培而濬。造物舒徐。
予善若靳。薄施于躬。適昌厥胤。惟宗伯公。曠代
人豪。士依矩矱。國倚忠勞。有開必先。繫公之教。
帝嘉義方。到隆其報。越宗伯公。暫展梓里。祿養
從容。高堂燕喜。慶者在門。吊者登几。天不憖遺。
山頽木毀。疇昔論心。予方弱冠。砥行脩文。惟公
是憲。復叨世雅。彌敦友善。杖屨追從。相期汗漫。
音微伊邇。風流遂空。斯文是悼。言返無從。酌此

椒漿。哭于寢宮。靈乎不昧。庶鑒予衷。

祭楊抑齋文

嘉靖庚申仲冬丁亥旦。抑齋先生楊君之櫬還。
其友莫子如忠迎哭諸野。又入而哭諸寢矣。越
九日丙申。謹致牲芻之奠。載拜酌酒而傷之曰。
嗟夫。余聞天道無親。常與善人。至執栽培傾覆
之說。以律古今天下。而有疑焉。故雨露之施。不
以腐草朽株而不及。而雷霆之摧折。則不必偏
物。日求其瑕釁。而得當焉。何哉。夫理有固然。有

所不必然事有可測有所不可測而後亭毒之
用神古今天下則既虧成消息其中而莫知所
自殆造物者之大較乎不然則如君者宜壽而
卒弗延宜有後而蓄且及其子謂之何哉余與
君交自卅角知君為深媿無能以其愚有所裨
益君而君或以余為不欺庶相與有終也而君
竟已矣嗚呼悲夫君有孫在抱三世一綫行道
哀之而况為友生者乎如造物之卒歸於常也
則君之忠鯁當竟暴於世而以其後之人食報

於幽者將復有在君其慰哉君其慰哉尚饗

祭何柘湖文

嗚呼文敬東吳際公特起問學淵停才名嶽峙
擅藻摛辭遠道左史雅尚在茲矻矻自喜憤詬
世紛去若脫屣睥睨宇宙疇為知己揆惟譎劣
締交昆季義附川萊葭契要蘭芷解組後先遺榮
樂志天靳斯綠殲此良懿季濫殞殂仲菴淪逝
愴往哀來言念終始舊雨盟寒高風誰侶庶慰
于幽立言不死既返而虞乃登公几夢耶真耶

達者一視尚饗

祭曹雙槐文

惟先生之明懿。表閭黨之醇風。遵素履之矩矱。秉和易而克恭。振樹屹其倜儻。稌度坦其朴忠。慨時事之孔艱。海濱罹於寇凶。欲廓清以拯溺。贊籌畫於元戎。啓胷中之武庫。戮鯨鯢于幽宮。夙宣勞于國事。夫遑恤乎瘁躬。舉賢科而弗第。名空記乎功宗。方沾恩以叙用。胡一疾而遽終。志有事於四方。乃反真于太空。余桑梓之伊邇。

締親誼之彌重。式容與以燕好。慰晚節於歸農。何歡悰之未畢。倏聞訃而冲冲。悵音徽之莫覩。渺仙路之焉窮。奠椒漿以申辭。冀微誠之感通。

祭少宗伯許龍石翁令嗣文爲部同僚作

維嘉靖某年月日通家侍生某某謹以牲肴酒醴之儀致祭于某某許先生之靈而申告之曰

惟靈纘箕裘之緒兮。稟川岳之英志。撫壯而方昌兮。器高朗而夙成。謂皇穹之司造兮。覃脩齡以畀哲。曷美好之弗終兮。有憑應而尚缺。摧鳳

毛於風穴兮。窘驥足於天衢。譬蘭茁其蕭艾兮。
玉不薦於瑤琚。長逝者豈可作兮。霜露淒其既
零。感余義於通家兮。鬱切怛乎余情。蕙殺馨其
盈俎兮。椒蘭旨其在尊。惟神則無不之兮。恍英
爽其若存。駟玉虬以來遊兮。覽瑤都之綺麗儼
容與以趨庭兮。慰椿華之遲暮。靈亦有子紛瓊
枝兮。允祖武之克繩。作求懿其雲仍兮。靈亦可
以無憾於冥冥。尚饗。

祭董朗洲同年文

維嘉靖二十九年歲次庚戌二月丙申朔越十
有八日癸丑年生莫如忠謹以束芻牲醴之奠
敢告于故河東鹽運司判官前進士尚寶司司
丞兼翰林院五經博士董朗洲年兄先生之靈
曰惟靈業未竟其志兮。位弗稱乎其才。攬琦瑰
將焉售兮。紉蕙蘭而蕭艾也。豈美好之弗祥兮。
將士窮之固恒也。憶天衢之並驚兮。摧矯翮於
長風。倏流示以捐殞兮。鬱切怛乎余衷。余衷其
偶未置君懷兮。匪明哲之故也。感存歿以盡交

紉

紉字宙奇

女。享。不。文。享。
芳。墓。宿。草。而。猶。哭。也。尚。饗。

真何氏室女文

嗟嗟令女天道仁耶將亭毒虔劉不能無私者耶吾德薄不能吾之子庇敢天道尤而以令女之生所自培德深厚如而父而不能庇汝不死謂造物無私然耶否耶吾不得其故而反思之吾子與令女生並迥異少而能慧若老成人不相期而相似也此其為尤物不見忌於造物者自古難之吾又惡敢漫為無益之悼終無已於

情耶令女雖未吾子歸而嘗旅邁自成幼有靈性吾子死而令女終不綺羅鮮好御豈是皆足崇耶嗟夫嗟夫生不同衾死復異穴神無不之將復共依樂土於人為載續之緣於物為連理之瑞吾等且老百年瞬息汝姑俟焉不恣令汝兩兒魂悵無歸也嗟夫嗟夫有酒一罌侑以蕪詞函致千里靈其鑒之

崇禎朝官集卷之

崇禎朝官集卷之二

五

國子監



